

周氏醫學散書



本艸經疏卷十二

木部上品

總七十二種今疏其要者二十九種

桂

松脂

實葉節附槐實枝皮根附槐花實條

枸杞

柏實

葉白皮附茯苓茯神

酸棗仁

蘖木

楮實乾漆葉附

五加皮

牡荆實

蔓荆實辛夷

桑止寄生杜仲

楓香脂

女貞實拘骨附

蕤核

丁香

沈香檀香

乳香

降真香

蘇合香金櫻子

放杖木

桂味辛甘大熱有小毒主溫中利肝肺氣心腹寒熱冷

疾霍亂轉筋頭痛腰痛出汗止煩止睡咳嗽鼻竇能墮

胎堅骨節通血脈理疎不足宣導百藥無所畏久服神

仙不老

元素補下焦不足治沈寒痼冷之病滲泄止渴去榮衛中風寒表虛自汗春夏爲禁藥秋冬下

部腹痛非此不能止

好古補命門不足益火消陰

日華子桂心治一切風氣補五勞七傷通九竅利關節

益精明日緩腰膝破痃癆瘕瘕消瘀血治風痺骨節攣

縮續筋骨生肌肉

甄權主九種心痛腹內冷氣痛不可忍咳逆結氣壅腫腳痺不仁止利殺蟲

治鼻中息肉破血通利月閉胞衣不下

疏桂稟天地之陽而兼得平土金之氣故其味甘辛

其氣大熱亦有小毒木之純陽者也潔古謂其氣熱味大辛純陽東垣謂其辛熱有毒浮也氣之薄者桂枝也氣之厚者肉桂也氣薄則發泄故桂枝上行而

發表氣厚則發熱故肉桂下行而補腎此天地親上
親下之道也桂枝入足太陽經桂心入手少陰厥陰
經血分桂肉入足少陰厥陰經血分夫五味辛甘發
散爲陽四氣熱亦屬陽氣味純陽故能散風寒自內
充外故能實表辛以散之熱以行之甘以和之故能
入血行血潤腎燥其主利肝肺氣頭痛出汗止煩止
唾咳嗽鼻龜理疎不足表虛自汗風痺骨節攣痛者
桂枝之所治也以其病皆得之表虛不任風寒寒邪
客之所致故悉主之以其能實表祛邪也其主心腹
寒熱冷疾霍亂轉筋腰痛墮胎溫中堅筋骨通血脉
宣導百藥無所畏又補下焦不足治沈寒痼冷滲泄

止渴止榮衛中風寒秋冬下部腹痛因於寒補命門
益火消陰者內桂之所治也氣薄輕揚上浮達表故
桂枝治邪客表分之爲病味厚甘辛大熱而下行走
裏故肉桂桂心治命門真火不足陽虛寒動於中及
一切裏虛陰寒寒邪客裏之爲病蓋以肉桂桂心甘
辛而大熱所以益陽甘入血分辛能橫走熱則通行
合斯三者故善行血命門者心包絡也道家所謂兩
腎中間一點明又曰先天祖氣是也先天真陽之氣
卽醫家所謂命門相火乃真火也天非此火不能生
物人非此火不能有生若無此真陽之火則無以蒸
糟粕而化精微脾胃之氣立盡而亡矣心腹寒熱寒

邪在裏也冷疾霍亂轉筋者脾與肝同受寒邪也行
二臟之氣則前證自止矣腰者腎之府動搖不能腎
將憊矣補命門之真陽則腰痛自除血熱則行故墮
胎也益陽則溫中筋者肝之餘也骨者腎之餘也入
肝入腎故堅筋骨也通血脉宣導百藥無所畏者熱
則通行辛則善散也陽長則陰消氣之自然者也能
益陽則消陰必矣寒邪觸心則心痛陽虛氣不歸元
因而爲寒所中則腹內冷氣痛不可忍咳逆者亦氣
不歸元所致也結氣壅痺腳痺不仁者皆寒溼邪客
下焦榮衛不和之所生也血凝滯而不行則月經不
通血瘀不走則胞衣不下九竅不通關節不利者榮

衛不調血分之病也消瘀血破痃癖癥瘕導肝氣通行瘀血之力也補五勞七傷者蓋指陽氣虛羸下陷無實熱之候也其日久服神仙不老甄權又謂殺三蟲治鼻中息肉大明又謂益精明目皆非其性之所宜也何者獨陽偏熱之質行血破血乃其能事陰精不長則陽無所附安所從得神仙不老哉味既帶甘焉能殺蟲鼻中息肉由於肺有積熱瞳子神光屬腎肉桂辛而大熱其不利於肺熱腎陰不足亦明矣益精明目徒虛語耳盡信書則不如無書斯之謂也

主治參互

得芍藥炙甘艸飴糖黃耆則建中兼止榮弱自汗

得石膏知母人參竹葉麥門冬治陽明瘧渴欲引飲
汗多寒熱俱甚 得白芷當歸川芎黃耆生地黃赤
芍藥白殭蠶治金瘡爲風寒所擊俗名破傷風 得
朴硝當歸下死胎 得蒲黃黑豆澤蘭益母艸紅花
牛膝生地黃當歸治產後少腹兒枕作痛甚則加乳
香沒藥各七分 得吳茱萸乾薑附子治元氣虛人
中寒腹痛不可忍虛極則加入參 佐參耆五味當
歸麥冬療瘡瘍潰後熱毒已盡內塞長肉良 入桂
苓甘露飲治中暑霍亂吐瀉殊驗 得薑黃鬱金治
怒氣傷肝脇痛 得當歸牛膝治冬月難產產門交
骨不開 得當歸牛膝生地黃乳香沒藥桃仁治跌

撲損傷瘀血凝滯腹中作痛或惱怒勞傷以治蓄血
發寒熱熱極令人不得眠腹不痛大便不秘亦不甚
渴脈不洪數不思食食亦無味熱至天明得汗暫止
少頃復熱小便赤此其候也和童子小便服之立除
簡誤

桂辛甘其氣大熱獨熱偏陽表裏俱達和榮氣散表
邪出汗實腠理則桂枝爲長故仲景專用以治冬月
傷風寒卽病邪在表者寇宗奭成無己論之詳矣一
覽可盡因附之於後肉桂桂心實一物也祇去皮耳
此則走裏行血除寒破血平肝入右腎命門補相火
不足其功能也然大忌於血崩血淋尿血陰虛吐血

咯血鼻衄齒衄汗血小便因熱不利大便因熱燥結
肺熱咳嗽產後去血過多及產後血虛發熱小產後
血虛寒熱陰虛五心煩熱似中風口眼歪斜失音不
語語言蹇澀手足偏枯中暑昏暈中熱腹痛婦人陰
虛少腹痛一切溫病熱病頭疼口渴陽證發斑發狂
小兒痧疹腹疼作瀉痘瘡血熱乾枯黑陷婦人血熱
經行先期婦人陰虛內熱經閉婦人陰虛寒熱往來
口苦舌乾婦人血熱經行作痛男婦陰虛內熱外寒
中暑瀉利暴注如火熱一切滯下純血由於心經伏
熱腸風下血臟毒便血陽厥似陰夢遺精滑虛陽數
舉脫陰目盲等三十餘證法並忌之誤投則禍不旋

踵謹察病因用舍在斷行其所明無行所疑其難其
慎毋嘗試也

附寇宗奭曰桂辛甘大熱素問云辛甘發散爲陽故
漢張仲景桂枝湯治傷寒表虛皆須此藥正合辛甘
發散之意本艸三種之桂不用菌桂牡桂者此二種
性止於溫不可以治風寒之病也然本經止言桂仲
景又言桂枝者取枝上皮也好古曰或問本艸言桂
能止煩出汗而張仲景治傷寒有當發汗凡數處皆
用桂枝湯又云無汗不得用桂枝汗家不得重發汗
若用桂枝是重發其汗汗多者用桂枝甘艸湯此又
用桂枝閉汗也一藥二用與木艸之義相通否平曰

本艸言桂辛甘大熱能宣導百藥通血脉止煩出汗
是調其血而汗自出也仲景云太陽中風陰弱者汗
自出衛實榮虛故發熱汗出又云太陽病發熱汗出
者此爲榮弱衛強陰虛陽必湊之故皆用桂枝發其
汗此乃調其榮氣則衛氣自和風邪無所容遂自汗
而解非桂枝能開腠理發出其汗也汗多用桂枝者
以之調和榮衛則邪從汗出而汗自止非桂枝能閉
汗孔也昧者不知出汗閉汗之意遇傷寒無汗者亦
用桂枝誤之甚矣桂枝湯下發汗發字當認作出字
汗自然出非若麻黃能開腠理發出其汗也其治虛
汗亦當逆察其意可也成無己曰桂枝本爲解肌者

太陽中風腠理緻密榮衛邪實津液禁固其脈浮緊發熱汗不出者不可與此必也皮膚疎泄自汗脈浮緩風邪干於衛氣者乃可投之發散以辛甘爲主桂枝辛熱故以爲君而以芍藥爲臣甘艸爲佐者風淫所勝平以辛苦以甘緩之以酸收之也以薑棗爲使者辛甘能發散而又用其行脾胃之津液而和榮衛不專於發散也故麻黃湯不用薑棗專於發汗不待行其津液也

松脂味苦甘溫無毒主疽惡瘡頭瘍白禿疥癬風氣安五藏除熱胃中伏熱咽乾消渴及風痺死肌煉之令白其赤者主惡瘡久服輕身不老延年

疏松脂感天之陽氣而得乎地之火土之化者也故其味苦而兼甘其氣則溫其性無毒得陽氣兼火土則其性燥燥則除溼散風寒苦而燥則能殺蟲甘能除熱胃中伏熱散則咽乾消渴自止痺者風寒溼合而爲病也地之溼氣感則害人皮肉筋脈此死肌之所由來也溼熱之邪散則血不瘀敗榮氣通調而無壅滯故主疽惡瘡榮和熱散則頭癩白禿疥癬風氣俱愈矣熱消則榮血和風溼去則衛氣安脾胃健五臟無病可知溼去則身輕可必久服不老延年固可想見

○松實味甘氣溫性和而無毒本經言苦者誤也以其

屬陽故亦主風痺寒氣其主虛羸少氣補不足者精不足補之以味甘能益血是已形不足溫之以氣溫能和氣是已服餌延年輕身不饑惟此足以當之然亦久服乃可責效耳

○松葉味苦溫而不甘宜其主風溼瘡生毛髮也安五臟守中不饑延年其旨具松脂條內服之可治惡疾卽癩病炙晝凍瘡風瘡佳

○松節味苦氣溫性燥故能主百節久風風虛腳痺疼痛

主治參互

陶弘景以松節釀酒主腳弱骨節風 丹溪以松節

炒焦用以治筋骨間病能燥血中之溼 外臺秘要
治厯節風痛四肢如解脫松節二十斤酒五斗浸三
七日每服一合日五六服 集簡方治陰毒腹痛油
松木七塊炒焦衝酒二鍾熱服 談壘翁方跌撲損
傷松節煎酒服

簡誤

松脂松葉其性甚燥味又苦溫病人血虛有火及病
不關風寒溼所傷而成者咸不宜服

槐實味苦酸鹹寒無毒主五內邪氣熱止涎唾補絕傷
五痔火瘡婦人乳瘕子藏急痛以七月七日取之搗取
汁銅器盛之日前令可作丸大如鼠屎內竅中三易乃

愈又墮胎久服明目益氣頭不白延年 枝主洗瘡及
陰囊下溼癩 皮主爛瘡 根主喉痺寒熱 花苦平
無毒主五痔心痛眼赤殺腹藏蟲及熱治皮膚風併腸
風瀉血赤白痢並炒服 葉平無毒煎湯治小兒驚癇
壯熱疥癬及疔腫

疏槐實感天地陰寒之氣而兼木與水之化故其味
苦氣寒而無毒別錄益以酸鹹宜矣入手足陽明兼
入足厥陰經其主五內邪氣熱者乃熱邪實也涎唾
多者脾胃有熱也傷絕之病其血必熱五痔由於大
腸火熱火瘡乃血爲火傷婦人乳瘕肝家氣結血熱
所成子藏急痛由於血熱燥火槐爲苦寒純陰之藥